



**ATASSUT**

**FM15/111**

**Steen Lynge**

**26.05.2015**

**Qanoq iliorluta meeqqat pitsaannerusumik angerlarsimaffiup avataanut inissitagut  
nammineersinnaanissaannut ikiorsersinnaanerivut pillugu apeqquteqaat aallaavingalugu  
oqallisissiaq**

(Inatsisartunut ilaasortaq Agathe Fontain, Inuit Ataqatigiit)

Meeqqat angerlarsimaffiup avataanut inissinneqarsimasut qanoq pitsaannerusumik –  
nammineersinnaanissaannut ikiorsersinnaaneri pillugit apeqquteqaat aallaavingalugu  
oqallisissiamut imatut Atassut-mit oqaaseqaatinik ilanngussiffigissavarput:

Meeqqat tamarmik toqqissisimasumik peroriartornissaq pisinnaatitaaffigivaat, qanorluunniit  
peroriartornerminni angajoqqaaminni imaluunniit ulloq unnuarlu angerlarsimaffinni  
najugaqartariaqarsimappata. Aamma meeqqat pisinnaatitaaffigivaat siunnersorneqarnissartik  
ilinniarnissartillu, taamaasillutik inersimasunngornerminni namminersorsinnaallualissapput.

Inuiaqatigiittut akisussaaffiuvoq innuttaasunut tamanut pitsaanerpaanik atugassaqartitsinissaq,  
aamma ilaqutariittut inuunermi atugassarititaasut pitsaasuusariaqarput. Ilinniarnissamut,  
sulinnissamut aamma ineqarnissamut periarfissat sinaakutissartai pitsaasuusariaqarput. Ilanngullugu  
aamma pingaaruteqarpoq, innuttaasut tamarmik inuuniarnerminni unammillernartunik  
nalaataqaraagamik siunnersorneqarnissaminnik aamma ikiorneqarnissaminnik periarfissaqarnissaat.

Taamaattoqassappat, taava pisariaqarpoq pisortat ataavartumik paasititsiniaallutik  
ingerlatsisarnissaat, pikkorissaasarnissaat aamma siunnersuisarnissat qanoq innuttaasut  
pitsaanerpaamik periarfissaminnik atorluaasinnaanersut aammalu qanoq inuuniarnermi  
unammillernartunik nalaataqarsimagaanni ingerlariaqqittoqarsinnaanersoq. Inuiaqatigiinni  
sinaakutissaqartariaqarpoq, meeqqanut angajoqqaat akisussaaffimminnik  
kivitsisinnaalluarnissaannut.



## ATASSUT INATSIARTUNI

---

Ajoraluartumik pissutsit imaapput, qanorluunniit angajoqqaat pitsaasunik sinaakkutissaqartitaangaluarlutik imaluunniit arlaatigut isumaginninnikkut ajornartorsiuteqarnerminni meerartaasa pisortanit isumagineqalertariaqartarneri. Meeraq pisortanit akisussaaffigineqaleraagat, taava immikkut illersorneqarnissamik pisariaqartitsilertarpoq, akisussaaffik inummut aaliangersimasuinnarmiikkunnaartarmat, illuatungaani ilaqutarinngisani inunni arlalinniilertarluni. Pingaaruteqarput avatangiisinut sinaakkutissat pitsaasut aammalu ulloq unnuarlu angerlarsimaffinni inuit piginnaasaqarluartut aalajaatsullu qitiusumik attaveqaataanissaat.

Aammattaaq pingaaruteqarluinnarpoq, meeqqat ulloq unnuarlu angerlarsimaffimmiittariaqarnerminnik paasinnissinnaanissaat takusinnaallugu qanoq siunissartik ingerlalersinnaanersoq. Meeraq neriuuteqartariaqarpoq, siunissami pitsaasumik inuuneqarsinnaanissaminnik, taamaattumik pingaaruteqarpoq, ullormut aaliangersimasunik sinaakkutissaqartitaanerup saniatigut siunissamut pilersaarusoqatigineqarnissaat.

Pisortat siullertut innuttaasunut tamanut pitsaaliuisussaapput – pingaartumik meeqqat – pisortat akisussaaffigilinnginnissaannut. Kisianni pisortat meeraq akisussaaffigilerpassuk, taava pisortat periarfissaqartitsisariaqarput meeqqat pitsaasumik ulluinnarni inuunerata ingerlasinnaanissaa, meerarlu piareersarneqartariaqarluni innuttaasutut nammineersinnaasutut. Taamaattumik pingaaruteqarpoq isumaginninnikkut aqqissuussaanerup pitsaalluinnarnissaa, tunngaviusumik inuttut pisinnaatitaaffinnik qulakkeerinnikkumalluni.